

DOMINGO 31 ORDINARIO CICLO C

PRIMEIRO Sab 11, 22 - 12, 2

Tes misericordia de todos, porque amas todo canto existe

PROCLAMACIÓN DA PALABRA RECOLLIDA NO LIBRO DA SABEDORÍA

Señor, o universo todo, de fronte a ti, é coma un lixo na balanza
e coma pinga de orballo da alborada caendo sobre a terra.
E nembargantes compadécícheste de todo, pois todo o podes
e pasas por alto os pecados dos homes para que se convertan,
pois amas a todos os seres
e non rexeitas nada do que fixeches:
se algo che dese noxo, xa non o crearías.
Como podería algo subsistir se ti non o queres
ou conservarse o que ti non chamas?
Mais ti todo o perdoas porque todo é teu,
Señor, amigo da vida.
Pois o teu sopro incorruptible mora en todas as cousas.
Por iso corrixes pouco a pouco a aqueles que tropezan
e amoéstalos lembrándolles os seus erros
para que, deixando a maldade, crean en ti, Señor.

SALMO RESPONSORIAL Sal 144, 1-2. 8-9. 10-11. 13cd-14
R/ (cf 1): Bendicirei por sempre o teu nome, meu Deus e rei

Meu Deus e meu rei, quero enxalzarte
e bendicir por sempre o teu nome.
Bendicireite o día enteiro,
louvarei por sempre o teu nome.

O Señor é clemente e compasivo,
tardo á ira e rico en amor.
O Señor é bo para todos,
agarimoso con todas as súas obras.

Lóuvente, Señor, as túas obras,
bendígante os teus amigos.
Pregoen a gloria do teu reino,
proclamen as túas fazañas.

O teu reino é reino eterno,
o teu goberno dura por xeracións.
O Señor sostén a todos os que caen
e endereita os que se dobran.

SEGUNDA 2 Tes 1, 11 - 2, 2

Sexa glorificado en vós o nome de Cristo, e vós nel

PROCLAMACIÓN DA PALABRA RECOLLIDA NA SEGUNDA CARTA DE SAN PAULO APÓSTOLO AOS TESALONICENSES

Irmáns e irmás:

Rogamos decote por vós, para que o noso Deus vos faga dignos da chamada e para que co seu poder faga realidade todo propósito de facer o ben e toda empresa de fe. Dese xeito vós daredes gloria ao noso Señor Xesús Cristo e el a vós, conforme a graza do noso Deus e do Señor Xesús Cristo.

Tocante á Parusía do noso Señor Xesús Cristo e da nosa xuntanza con el, rogámosvos, irmáns, que non abaledes tan axiña nos vosos criterios nin vos desconcertedes por supostas revelacións, ditos ou cartas nosas coma se o Día do Señor estivese a caer.

ALELUIA Xn 3, 16:

Tanto amou Deus o mundo, que lle entregou o seu Fillo unixénito;
quen cre nel ten vida eterna.

DOMINGO 31 ORDINARIO CICLO C

EVANXEO Lc 19, 1-10

Veu o Fillo do home buscar e salvar o que estaba perdido

PROCLAMACIÓN DO SANTO EVANXEO SEGUNDO LUCAS

Daquela, chegou Xesús a Ierico e pasaba atravesando a cidade. Había alí un home chamado Zaqueo, xefe dos recadadores e moi rico. Intentaba ver quen era Xesús; pero impedíallo a xente, porque el era pequeneiro. Entón botou a correr e subiu a unha figueira para velo, porque ía pasar por alí. Ao pasar Xesús por aquel lugar, levantou a vista e díxolle:

- Zaqueo, baixa de contado, que hoxe teño que parar na túa casa.

El, baixando de contado, acolleuno moi contento. Pero vendo aquilo, a xente empezou a murmurar:

- Entrou a se hospedar na casa dun pecador.

Zaqueo, posto de pé, díxolle ao Señor:

- Señor, darei a metade de todo canto teño aos pobres e, se algo roubei a alguén, devolvéille catro veces máis.

Entón Xesús dixo:

- Hoxe chegou a salvación a esta casa, pois tamén este é fillo de Abraham. Porque o Fillo do Home vén buscar e salvar o que estaba perdido.